


NIJSBERICHTEN

VAN



STICHTEN

Oktober 2024

RIJKSWEG WEST 83, 9608 PB WESTERBROEK

SOAMENSTELLEN BESTUUR

Doagelks bestuur:

Veurzitter: ds. Klaas Pieterman, Nijkerk ('t Hogeland)

Siktoares: Klaas de Vries, Westerbrouk

Puutholder: Siebe Gorter, Oethoezen

Aander leden: Greta Huis, Loppersom

Willem Tjebbe Oostenbrink, Zuudhörn

ds. Marten de Vries, Winzum

Koos Wiersma, Lains.

OKTOBER 2024
JOARGANG 33 – NUMMER 66

Redaksie & Vörmgeven	Henke van der Veen
Redaksie-adres	vanderveenh@ziggo.nl
Giroreken	NL48 INGB 00031843 45
	t.n.v Liudgerstichten

IENHOLD

Eerste woord – Klaas Pieterman	4
Nijs van siktoares – Klaas de Vries	5
Biedroage puutjeholder – Siebe Gorter.....	7
Middelsommer Kerk – Fré Schreiber.....	8
Grunneger Dainsten	11

EERSTE WOORD

Poask vil vroug van t joar. En mit gevolg Hemelvoart en Pinkster ook, resp. vatteg en vieftteg doagen noa Poask.

Doatum van Poask wizzelt omdat dij bepoald wordt deur stand van moan. Aandere feestdoagen hangen soamen mit stand van zun.

Eerste zundag van haars is aaltied op eerste zundag noa 21sten september.

Mor doarom kin we nog wel n mooie noazummer hebben, ien Amerikoa: Indian summer, ien t Grunnegers: kraaikezummer.

Op overgang noar haars valen vanolds ook de quartemperdoagen, dankdoagen veur t gewas.

Ien ons contraainen is dankdag verzet noar eerste wonsdag ien november. Of noar zundag noa dij wonsdag. Din wordt der n oogstdainst vierd, voak mit n oogsttoavel doar allerhande vruchten van t veld en van bomen op liggen.

Ien tiedvak van haars en Advent binnen der aacht Grunneger dainsten. o.a. ien Dörpskerk Scheemde. Doar is op 29sten dezember Grunneger 1000 dainst, m.m.v. Edwin Jongedijk, zang en Greta Huis, veurganger. Veur ale Grunneger dainsten en aandere waitenswoardegheden kin je terecht op www.liudger.org.

En verder heb we n verhoal veur kiender en grote minsken opnomen van Fré Schreiber.

En wat siktoares schrift. Is ook aaltijd lezensweerdeg.

Klaas Pieterman

KOPIJ

t Volgende nummer van Nijsberichten komt as ales goud gaat, weer oet ien meert 2025.

As ie wat te melden hebben, den kin ie dat sturen noar t redaksie-adres: vanderveenh@ziggo.nl. Joen biedroage is welkom!

NIJS VAN SIKTOARES

Beste Lezers,

Even bieproaten over zoaken dij der goande wazzen, binnen en kommen.

Wat der was:

Op 13den maaï 2024 haren wie bestuursvergoadern ien Oskerd.

Doar dee bestuurslid Marten de Vries verslag van kascontrole bie puutholder Siebe Gorter. Marten haar der grondeg noar keken en vond boudel ien orde. Puutholder mag deur!

Puutholder haar begroten ook kloar en dij wer goudkeurd.

Wie stelden mit n kander vast dat t begunstegersaantal hail gestoag wat terug lopt. Hail voak as gevolg van t overliden van mensken dij joarenlaank traauwe begunstegers wazzen mor dij gain “opvolgers” hebben.

Vraize dainst. (44ste Fryske tsjinst yn it Grinzer lân)

Op 26sten maaï is dij holden ien kerk van Aizing.

Dainst wer slim op pries steld deur mensken dij der wazzen.

t Aantal bezuikers kon wel n beetje meer lieden. Wel wait bie de 45ste

Vraize dainst ien 2025. Kerk van Aizing beviel goud en Albert Viersen haar zien zuster mitnomen dij tuba speulde bie t örgel en t Martinikerkkoor waarkte mit. Ds. David de Jong oet Harlingen ging veur.

Graddie Meijer het zich noa hail wat joaren terugtrokken oet t bestuur van Liudgerstichten.

Graddie bedankt veur dien ienzet en ienbreng!

Op 23 sten september hebben wie n bestuursvergoadern holden ien Oskerd ien toen van t Berlagehoes. Wie konden der deur n mistverstand nait ien. Gelukkeg was t prachteg weer.

Wie hebben t zingen van laid aan t begun van vergoadern even achterwege loaten. (wie wollen t risico nait lopen dat men denken zol dat wie “doen ien Oskerd” wazzen).

Foto van t nait haidal complete bestuur druk wie ook even veur joe of.

Wat lopt:

Beriemenskemizzie : Dij hebben al hail wat laiden ient Grunnegers beriemd oet t nije laidbouk 2013 en dij ook op website zet veur t gebruik zoas ook Psalms en Gezangen doar opstoan.

Nou wazzen wie van plan om der ook n bundeltje van oet te geven, mor bie t veurwaark doarvan wer dudelk dat der nog wat oapen en beren op weg binnen met betrekken tot autersrechten. Wie binnen der nog mit aan t oetzuiken hou dat verder aanpakt worden mout. Wie hebben votdoadelk de publikoaties op website even onzichtboar moakt om noaregheden veur te wezen. Wordt vervolgd dus.

Ons website is wat verolderd en ons beheerder het zien bedrief stop zet. Ien oveleg mit hom goan we op zuik noar nije beheerder. Mochten ie problemen hebben om op site te kommen den kin dat kommen dat joen bevaailiging ons site aankikt veur onbetraauwboar deurdar e veroldert is. Ien dat geval kinnen ie t beste op joen virusscanner aangeven dat ons site vaailig is.

Veurleesmaterioal veur kiender:

Fré Schreiber was deur ons vraagd om naomens Liudgerstichten een stukje veur kiender te schrijven.

Fré wol dat wel doun, mor nou haar redactie van t blad Wiesneus gain roemte om t ploatsen. Om dij reden kommen ie t stukje veur kiender van Fré nou ien Nijsberichten tegen. Mit dank aan Fré!

Begunstegersmirreg:

Dat gaat ons ien 2024 nait lukken. Wie haren wel wat plannen ien richten van Muzzel en omstreken mit RK parochie doar, mor doar kwam meer waark achter weg as eerst docht was.

Tied en mankracht van ons kaant was der nait voldounde om dat goud op te zetten, en wie willen gain haalf waark.

Noajoar 2025 hoop wie joe weer wat aan te baiden ien Hoezen (Huizinge).

Wat Komt:

Bestuurvergoaden op 13den of 15den jannewoarie 2025.

24sten december om 23.59 Kerstnachtsdinst ien Oostum mit as
veurganger ds Graddie Meijer.

Kiek veur meer activiteiten op toal en cultuur ook ais even op

<https://cgtc.nl/>

Groutnis en achten,

Klaas de Vries , siktoares Liudgerstichten

Biedroage veur 2024!

Mochten ie der nog nait aan tou kommen wezen om dat te regelen din kin
dat nog mooi even veur t Nijjoar.



Banknummer van Stichting Liudgerstichten is NL48 INGB 0003 1843 45

Veur biedroagen dij al binnen bennen stief bedankt!

Veur luu dei smartphone hebben mit QR-code kin

dat nou ook. Nait alle banken ondersteunen dit.

Mit camera lukt het wel goud.

Siebe Gorter, puutjeholder

Bestuursvergoadern holden ien Oskerd ien toen van t Berlagehoes.



Op foto:

- Links veur Klaas Pieterman (veurzitter)
- Links achter Klaas de Vries (siktoares)
- Rechts veur Marten de Vries (bestuurslid)
- Rechts achter Siebe Gorter (puutholder)
- Der ontbreken drij bestuursleden.

MIDDELSOMMER KERK

‘Dé, hier hest ook ain, aans is t zo haard aan t gat.’ t Is Janko, mor ze nuimen hom köster.

Leon pakt t kuzzen aan en gaat ter op zitten. Zo, dat is beter. Hai wacht op veurstellen dij kommen zel. Dit is wel n hail biezunder gebaauw.

Zulf het e nog nait voak ien n kerk west, mor opa haar hom verteld dat ter veul te zain was en dat is zo.

Grode broene baank dij middenien staat is veul dikker en defteger as dij aandern, doar het meester op schoul over verteld.

Op zundag zaten belangriekste mensen van Middelsom doar ien.

‘Want,’ zee meester, ‘ien ons dörp hebben drij börgen stoan, dat binnen soorten van kestailtjes. Doar is nait veul meer van over, behaolve n ol poort en dij koepel bie Ewsum, eefkes boeten t dörp.’

En meester haar verteld dat op ain van dij börgen n wottergeus woonde. As je waiten wat n wottergeus is, wait je ook dat dij vochten het ien grode oorlog dij hoast 80 joar duorde.

Dij wottergeus, dij nuimd was noar n stroat of net aansom, haitte Barthold Entens.

Hai was veur duvel nait baang en n dikke vraidhoed. ‘Wie binnen as Middelsommers tröts op hom mor schoamen ons der ook wel n beetje veur.’ Woar zol e nou begroaven wezen?

Meester zee dat dat ien kerk was, mor grafzaark zigt e nait.

As zun zien licht deur grode roamen schienen let, vaalt Leon zien oog op schilderns opmmuren boven hom. Wat veul en wat n kleuren, olderwetse kleuren.

Veul vogels: paauw, aind, oel, doef, swaalf. Zel wel wat betaiken, want dat is mainstaal zo ien kerk. En din t ploetje van twij mensen, n man en n vraauw, dij spierlieke noakend noast n boom stoan, nou noakend, man holdt n gruin bladje veur zien kruul. Om stam van boom krioult n slaang.

Vraauw het nappel ien haand. Dut denken aan verhoalen dij opa veurleest oet t dikke bouk noa t eten.



n Bouk mit prachteg kleurege ploaten en spannende verhoalen.
Zo as van n reus dij deur n herder doodslingerd wordt.
Of van dij starke kerel dij n laiw verscheurde.
Opa ging as kiend aal zundoagen noar dizze kerk. t Zingen was aaltied wel
mooi, mor proaterij duurde laank en hai begreep der niks van.
Op n duur ging e nait meer hen.
Der kwammen aal minder mensen ien kerk, op t lest waren der zo waaineg
dat dij mor noar dij aander kerk overlaipen en ging deur van kerk dicht.
Dicht veur kerkdainsten mor nait veur aander dingen zo as toneel.
'En dan is dit het einde van de voorstelling,' Leon schrikt, kikt om hom tou
en lopt mit t aander volk tou kerk oet. Kinst aan mensen zain dat ze heur
vermoakt hebben, hai ook.

Fré Schreiber

GRUNNEGER DAINSTEN

Oktober 2024

27	10.00 uur	Amsterdam Lutherse Kerk aan 't Spui	domie Donga
27	19.00 uur	Winzum, PKN Kerk	domie Tammo J. Oldenhuis

November 2024

3	19.00 uur	Dörkwerd Hervormde Kerk	domie Tammo J. Oldenhuis
10	9.30 uur	Kerk Finsterwolde	domie Klaas Pieterman
10	19.00 uur	Knoal Semstroatkerk	domie Tammo J. Oldenhuis

Dezember 2024

24	23.59 uur	Kerstnachtdainst Kerkje van Oostum	domie Graddie Meijer
29	10.30 uur	Scheemde Torenstroatkerk Groninger 1000	domie Greta Huis

Jannewoarie 2025

5	09.30 uur	Mennistenvermaning Uithuizen	domie Klaas Pieterman
---	-----------	---------------------------------	-----------------------

Meert 2025

23	09.30 uur	Kerk Hoezng	domie Klaas Pieterman
----	-----------	-------------	-----------------------

April 2025

27	19.00 uur	Kerk van Westerbrouk Olweg 75	domie Tammo J. Oldenhuis
----	-----------	----------------------------------	--------------------------

Maaï 2025

4	09.30 uur	De Weite PG Vlagtwedde	domie Klaas Pieterman
---	-----------	------------------------	-----------------------

Kiek veur meer gegevens en meer (nije) kerkdainsten veuraal eefkes op
webstek van Liudgerstichten (www.liudger.org)
